

**Peneroka dakwa pelajar terlibat kempen Tenang
Malaysiakini.com
January 19, 2011**

Seorang peneroka Felda membuat laporan polis mendakwa sekumpulan pelajar sekolah tingkatan empat dan lima terlibat dalam kempen pilihan raya kecil DUN Tenang.

Peneroka Felda Bukit Batu, dekat Kulai, Norzaidi Rahamat mendakwa beliau mendapati perkara itu apabila ternampak kumpulan itu menunggu bas untuk ke Felda Cemplak Segamat - tempat lawatan Datuk Seri Najib Razak semalam - untuk berkempen.

Dalam kejadian kira-kira jam enam pagi itu, Norzaid, 43, yang juga ahli jawatankuasa (AJK) Persatuan Anak Felda Kebangsaan (ANAK) - NGO yang rapat dengan PAS - menjelaskan beliau ketika itu sedang pulang dari masjid.

Kesemua mereka berpakaian biasa dan disertai ketua kampung dan AJK Felda Bukit Batu, dakwanya lagi.

"Laporan ini dibuat untuk tindakan pihak yang berkuasa supaya di masa akan datang tidak berlaku perkara seperti ini," laporan polisnya dipetik.

Aduan itu didedahkan oleh Ketua Penerangan PAS Johor Mazlan Aliman dalam sidang medianya pagi tadi. Norzaidi tidak hadir dalam sesi itu.

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/153883>